

BERCK 2020 SOUVENIRS - conversation su' ch' trottoir in face dé l' boulangerie (Essai)

Germaine, eune vieille femme ; alle est appuyée sur sin bâton, avec ses gambes inflées tout intourées d' bandaches, sin sac à commission dins s' main, et sin viux foulard su s' tiête ; alle sort dé l' boulangerie et alle qué nez à nez sur Jacqueline, gramint pus jeaunne qu'elle, qui arvient d' vacances à Berck

- Alors chés vacances à Berck, cha s'a bien passé ch' t' année ?
- (...)
- Vous avez eu biau temps ?
- (...)
- Y'a qué dé l' pluie !... Ah bon ! Bin ichi in n'a pas eu eune goutte ! Min persil i est tout réchué du solelle et mes géraniums, j'ai dû les arroser deux fos par jour ...
- (...)
- Y' avot du vint ?... Ah mais cha, ché souvint à berck qu'y a du vint ! Du vint frod qui vient d' la mer et qu'in a du sabe plein ses ziux ! Dins l' temps quand cha soufflot comme cha, in allot à l' baie d' l' Authie, ou bien in s'abritot derrière chés cabines
- (...)
- In peut pus ? ... Des cabines i n'a presque pus ? Pis alles sont toutes éd' berzinqué avec des trous in d'sous ? Avec des canettes et des boîtes macdo qu' chés jeaunes i z'ont pus l' courache d' aller mette à l' poubelle ? Que époque !... Cha dégôte... In véyot pas tout cha avant
- (...)
- Enfin vous n'avez bien profité quand minme ... Nan ? Pas d' trop ... Ah bon ... Ch' tiot i' a été malade ? Avec dé l' température ? Vous avez dû appeler ch' docteur ... Et quo qu' ché t'i qui nous a fait ? Eune angine ?... Pauv' jeaunne ! Y' a dû suremint prinde frod au soir sur l'esplanade ...
- (...)
- Et chés cerf volants ? Ah ! cha, cha dot ête biau à vire ! ... Y' a eu ch' concours ? Nan... ? I n'a pas eu ch' t'année ? Cha a été annulé ? A cause dé ch' virus ? Ah ya ya, que jus avec cha ! Bin ichi cha a été parelle ; i zont annulé ch' corso fleuri pis ch' fu d'artifice ... que triste été ! ...
- (...)
- Comme él' ducasse, alle a cor' rapétiché l'année chi ... Y' a pus chés foules qu'in véyot avant ... A Berck, i z'ont fait l' ducasse quand minme derrière él' gare routière ? ... Ah bon ! ché pus eune gare ?... Ché un casino ... Bon mais y'avot des manèges ? Nan, pas gramint ... Ché pus comme avant, hein, vous vous rappelez tous chés loteries, chés marchands d' nougats, tout cha, chés zautos tamponnantes, chés zavions !... chés jeaunes i n'étoient sots, i voulotent pus déchinde !...
- (...)
- Chu qui est bien à Berck ché d'aller faire un tour au soir sur l'esplanade, s'assir su ch' mur et raviser passer chés gins in mingeant eune glace, qu'in a eu bien caud tout l' journée ... Y' avot pas grand monde ? Vous avez quand minme été minger eune glace au Cornet d'amour ? Non pus... Ché trop quère ... Ché sûr, à quate, cha dot buquer !...
- (...)
- Et Bagatelle, j' y arpinse, vous avez été passer eune journée comme tous z'ans ? Ché toudis aussi bien, chés animaux dins ch' zoo, chés balançoires, ch' petit train ... ? Et l'intrée, à combien qu'alle est asteure ? Combien ??? ... 27 euros l'intrée par personne pis 20 euros pour chés gosses ???!... Pis faut cor payer ch' parkinne in plus ?... Vous rindez compte, cha fait 100 euros à 4 ! ... Pis y'a pas qu' cha, faut cor acater à minger !! Chucher eune glace ... Boire un verre avant d'arpartir ... Ah ! bin , j' comprends qu' cha arvient quère des vacances à Berck !

- (...)
 - Du coup vous avez resté qu'eune semaine ? Bin ouais, jé m' doute bien ! In peut pus y' aller un mos comme avant ! pis chés locations, cha dot pas ête donné non pus... Faut compter combien asteure au mois d'aôut ?... 600€pour eune semaine ? ... Bin dis-donc ! ... Ah ! mais chétot pas lon d' la mer ... Ouais mais quand minme !... Pour eune semaine ... Vous vous rindez compte pour un mos ? ! Qui ché qui peut payer des sommes parelles ! Avec ém' tiote pinsion, mi j' pourros pu y' aller, in vacances ! déjà rien qu'à payer l'autobus ...
- (...)
 - Enfin chés gosses, i zétotent contints ? I n'ont bien profité ? I z'ont été s' baigner ? L' iau alle étot froide... Et péquer des crevettes dins chés flaques ? I n'a pus... I z'ont joué dins l' appartement ... Ah bin, que voulez-vous, à Berck, in réussit pas tous z' ans ! Cha ira miux l'année prochaine... Ah nan ? Vous z' y artournerez pas ? Vous pinsez aller dins l' midi cacher après du solelle ? Ché sûr là-bos i fait plus caud mais y'a du monde aussi ... Et faut faire la route, y' a eune sacrée trotte ...
- (...)
 - D'ichi là faut cor' pinser à l' rintrée, rhabiller chés gosses, racater chés affaires d'école, tout cha ; pis des masques aussi l'année chi ! Que jux avec leu virus ! Mette des masques à l'école ! Comme si qu'in férot mardi gras à l' rintrée !.. In vit eune drôle d'époque ! Dù qu'in s'in va ?... Comment qu' cha va finir tout cha ! ... Diminche j'irai mette un cierge à l'église Sainte Barbe (1)...
- (...)
- Allez bin, bonne rintrée quand minme ...

(1) : L'église Sainte Barbe alle a fermé d' pis belle lurette, ché devenu un musée asteure ; mais j'ai pas osé li dire ...